

**СЕПТЕМВРИА В 26-Й ДЕНЬ**

**ПРЕСТАВЛЕНИЕ СВЯТАГО АПОСТОЛА И ЕВАНГЕЛИСТА  
ИОАННА БОГОСЛОВА.**

**НА МАЛЕЙ ВЕЧЕРНИ**

**на Господи возвах, стихиры, глас 2.**

**Подобен: Егда от древа:**

**Приидите** премудрости глубину и православных догматов писателя, вернии, песньми божественными днесь венчаим Иоанна славнаго и возлюбленнаго: сей бо възгреме, еже в начале бе Слово. Отонудуже громогласен показася, яко благовестие миру просияв, многомудренне приснопамятный. [Дважды.]

**Воистинну** ты явился еси истинен друг, наперсник велик Учителю Христу: на перси бо възлег, отонудуже почерпл еси премудрости догматы, имиже обогащаеши окрест всю землю, яко богоглагольник Божий. Темже и содержащи сия, красная Христова Церковь ныне радующихся веселится.

**Радуйся** Богослове истинно, радуйся, Матере Господни сыне вселюбезне, ты бо предстоя при Кресте Христове божественный слышал еси глас Владыки: се ныне Мати твоя, к тебе возопившаго. Отонудуже достойно тя вси, яко апостола Христова великаго и возлюбленнаго, ублажаем.

**Слава, глас 2. Самогласен:**

**Апостолов** верх, богословия трубу, духовнаго воеводу, вселенную Богу покорившаго, приидите, вернии, ублажим Иоанна приснопамятнаго, от земли преселяющагося, и земли не отступающаго: но живуща, и ждуща страшное Владыки второе пришествие. Еже неосужденно срести нам испроси любимиче, таинниче, Христов наперсниче, любовию совершающим память твою.

**И ныне, Богородичен.**

**На стиховне стихиры, глас 1.**

**Подобен: Всехвальнии мученицы:**

**Богослове** славне, твоими божественными учении, и чудес явленными, прелести отгнал еси мглу всю, и люди просветил еси к знанию истинныя веры: и ныне моли, даровати душам нашим мир, и велию милость.

**Стих: Во всю землю изыде вещание их. и в концы вселенныя глаголы их.**

**Иоанне** всемудре, Христов любимиче присный, к плоти любви мя избавляя, Владыце всех, божественными твоими мольбами водружи. Детельми благочестия, и молися подати ми оставление прегрешений и велию милость.

**Стих: Небеса поведают славу Божию, творение же руку Его возвещает твердь.**

**Боговидче** всесвященне, страстей и бед избави, и от недуг и скорбей благохвалящая тя, и почитающая любовию, и верно притекающая, и к покрову

твоему божественному приходящая: и умоли даровати душам нашим мир и велию милость.

**Слава, глас 2:**

**Б**огослове девственнице, учениче возлюбленне Спасов, молитвами твоими нас спасай, молимся, от всякаго вреда: яко твое есмы стадо.

**И ныне, Богородичен:**

**В**се упование мое на Тя возлагаю, Мати Божия, сохрани мя под кровом Твоим.

**Тропарь, глас 2:**

**А**постоле Христу Богу возлюбленне, ускори избавити люди безответныя: приемлет тя припадающа, Иже падша на перси приемый. Егоже моли, Богослове: и належащую мглу языков разгнати, прося нам мира и велия милости.

**Слава, и ныне, Богородичен, воскресен.**

## **НА ВЕЛИЦЕЙ ВЕЧЕРНЕ**

**стихологисуем Блажен муж, первый антифон.**

**На Господи, возвах, стихиры на 8. Глас 1-й.**

**Подобен: Небесных чинов:**

**З**ритель неизреченных откровений, / и сказатель вышних Божиих таин, / сын Зеведеев, / написав нам Христово Евангелие, / богословити Отца и Сына / и Духа Святаго, / научил есть.

**Б**огодвижимая цевница Небесных пений, / тайнописец сый, Богосказанная уста, / пение песней поет красно, / устне бо движа, / яко струны, / якоже бряцало язык движа, / и молится спастися нам.

**Г**ромогласным твоим языком / извещая Божия мудрости сокровенное слово, / Богу возлюбленне, / зовещи присно, / движа устнами часто: / еже в начале бе Слово, / и научаеши всякаго человека к знанию Бога.

**Слава, глас 2-й. Самогласен.**

**С**ына громава, основание Божественных словес, / начальника Богословия и проповедника первейшаго / истины догматов Божия мудрости, / возлюбленнаго Иоанна и девственника, / человеческий род по долгу благопохвалим: / сей бо непрестанно в себе имея Божественное, / еже, в начале бе, рече, Слово, / абие же ко Отцу неразлучное, / и равное по сих Отча Существа, / показуя нам Собою православие Святыя Троицы: / Содетеля же суца со Отцем, / и жизнь носяща и Свет Истинный Тогожде показа нам. / О, чудесе ужаснаго, / и вещи мудрительныя! / Яко полн сый любви, / полн бысть и Богословия, / славою и честью и верою, / основатель сый чистыя нашея веры. / Еяже ради получим благая в день судный.

**И ныне, Богородичен, глас тойже:**

**П**режде сень законная, / Благодати пришедши, / якоже бо купина не сгараше опаляема: / тако Дева родила еси, и Дева пребыла еси. / Вместо столпа огненнаго / праведное возсия Солнце, / вместо Моисея Христос / Спасение душ наших.

**Посем Свете Тихий:**

**Прокимен дне: И чтения три.**

**Соборнаго послания Иоаннова чтение.**

**В**озлюбленнии, аще сердце наше не зазрит нам, дерзновение имамы к Богу. И егоже аще просим, приемлем от Него: яко заповеди Его соблюдаем, и угодная пред Ним творим. И сия есть заповедь Его, да веруем во имя Сына Его Иисуса Христа, и любим друг друга, якоже дал есть заповедь нам. И соблюдаяй заповеди

Его, в Нем пребывает, и Той в нем: и о сем разумеем, яко пребывает в нас, от духа егоже дал есть нам. Возлюбленнии, не всякому духу веруйте, но искушайте духи, аще от Бога суть: яко мнози лжепророцы изыдоша в мир. О сем познавайте духа Божия, и духа лестча: всяк дух, иже исповедует Иисуса Христа во плоти пришедша, от Бога есть. И всяк дух, иже не исповедует Иисуса Христа во плоти пришедша, от Бога несть: и сей есть антихристов, егоже слышасте, яко грядет, и ныне в мире есть уже. Вы от Бога есте чадца, и победисте тех, яко болий есть Иже в вас, нежели иже в мире. Они от мира суть, сего ради от мира глаголют, и мир тех послушает. Мы от Бога есмы: иже знает Бога, послушает нас: и иже несть от Бога, не послушает нас.

### **Соборнаго послания Иоаннова чтение.**

**Возлюбленнии,** аще сие возлюбил есть нас Бог, и мы должны есмы друга друга любити. Бога никтоже нигдеже виде. Аще друг друга любим, Бог в нас пребывает, и любви Его совершенна есть в нас. О сем разумеем, яко в Нем пребываем, и Той в нас, яко от Духа Своего дал есть нам. И мы видехом и свидетельствуем, яко Отец посла Сына Спасителя миру. Иже аще исповесть, яко Иисус есть Сын Божий, Бог в нем пребывает, и той в Бозе. И мы познахом, и веровахом, любовь юже имать Бог в нас. Бог любви есть, и пребывая в любви, в Бозе пребывает, и Бог в нем пребывает.

### **Соборнаго послания Иоаннова чтение.**

**Возлюбленнии,** аще кто речет: яко люблю Бога, а брата своего ненавидит, ложь есть: ибо не любяй брата своего, егоже виде, Бога, Егоже не виде, како может любити? И сию заповедь имама от Него, да любяй Бога, любит и брата своего. Всяк веруай, яко Иисус есть Христос, от Бога рожден есть: и всяк любяй Рождшаго, любит и Рожденнаго из Него. О сем вемы, яко любим чада Божия, егда Бога любим, и заповеди Его соблюдаем. Сия бо есть любви Божия, да заповеди Его соблюдаем, и заповеди Его тяжки не суть. Яко всяк рожденный от Бога, побеждает мир: и сия есть победа побеждающая мир, вера наша. Кто есть побеждая мир, токмо веруай, яко Иисус есть Сын Божий?

### **На литии стихира храма. Таже апостола. Глас 1.**

**[Германово:]** Веки богословия из честных твоих уст истекоша, апостоле, из нихже Церковь Божия напаяема, покланяется православно Троице Единосущней: Юже и ныне моли, Иоанне Богослове, утвердити и спасти души наша.

**[Андреа Пирра:]** Сад чистоты, миро благовония паки возсия нам в присущем празднице, возопити к нему: возлегий на перси Владычня, и одождив слово миру, Иоанне апостоле, Деву сохранивый яко зеницу ока, испроси нам от Христа велию милость.

**Учениче Спасов,** девственниче и Богослове, тебе яко девственнику, Деву и Богородицу, Христос Бог распинаемь предаде, и Сию сохранил еси яко зеницу ока. Тем моли спастися душам нашим.

**Я**ко неизреченных таин самовидец, возвах еси вопия: Превечное Слово, в начале быти к Богу, и Того быти Бога, Иоанне апостоле, наперснице Христов и друже присный, Троицы сладосте, Ефеса и Патма утверждение непоколебимо, наша же помощь. Молися, Богослове всеблаженне, от злочестивых врагов чувственных и мысленных, избавитися людем, память твою присно совершающим верно.

#### **Слава, глас 4:**

**В**озлег на перси Учителя Христа на Вечери Господни, возлюбленне учениче, отгуду познал еси неизреченная, и небесный всем возгремел еси глас: в начале бе Слово, и Слово бе к Богу, и Бог бе Слово, Свет истинный, просвещающий всякаго человека в мир грядущаго, Христос Бог и Спас душ наших.

#### **И ныне, Богородичен.**

**С**о Отцем и Духом славословимый Сын, в вышних от херувимов, первозданнаго наздати хотяй, всего Себе Самаго истоци неизреченно во утробе Твоей, Богородице всепетая: и из Тебе возсияв, просвети весь мир Божеством, избавляя идолонеистовства, и в Себе обожив, на небеса возведе человечество, Христос Бог и Спас душ наших.

#### **На стиховне стихиры, глас 4-й.**

##### **Подобен: Званный свыше:**

**С**ына Вышняго богословив, / Отцу Соприсносушна и Единосушественна, / Свет из Света Непременен / и Начертание Ипостаси Родительвы, / безлетно возсиявша и безстрастно из Него, / Содетеля же и Господа всех веков, / возлюбленне ты проповедал еси Сего миру, / яко Изведша свет из тьмы / Христа Бога нашего. / Егоже моли, спасти и просветити души наша.

**Стих: Во всю землю изыде вещание их, и в концы вселенныя глаголы их.**

**У**тешителей свет восприем, / имже и просвещаемь богословил еси, / от Отца происходящаго, / чрез Сына же человечеству являема, / Единочестна, Сопрестольна и Единосушна Суща / Отцу Безначальному же и Божию Слово, / возлюбленне, всем проповедал еси. / Темже в песнях ты почитаем яко веры / Божественное основание, / юже незыбленну соблюдай ко Господу / молитвами твоими.

**Стих: Небеса поведают славу Божию, творение же руку Его возвещает твердь.**

**Н**а высоту возшед Богословия, / научился еси неизреченным Божиим тайнам, / о Едином существе Божества, / Славе же единой, и Царстве и Господстве, / Трех Ипостаси разделяем присно, / существенно нераздельнем и соединеннем, / в неслиянном Божественном Единстве, / сице славя проповедал еси, Богослове, / Троицу Нераздельну. / Юже моли спасти и просветити души наша.

### **Слава, глас 6-й,**

**Иоанна монаха:** Апостоле Христов, / Евангелисте Богослове, / неизреченных таинник быв, / премудрости неизглаголанная нам возгремел еси учения, / еже в начале бе, / уяснив верным, / и еже не бе, отложив, / еретичествующих отревая словеса, / наперсник явився и друг возлюблен, / якоже Исаиа велегласнейший / и Моисей Боговидец, / дерзновение имея к Богу / прилежно молися о душах наших.

### **И ныне, Богородичен, глас тойже:**

**Творец** и Избавитель мой, Пречистая, / Христос Господь, / из Твоих ложесн прошед, в мя оболкийся, / первыя клятвы Адама свободы: / темже Ти, Всечистая, яко Божии Матери же и Деве воистинну, / вопием немолчно: / радуйся, ангельски, / радуйся, Владычице, / Предстательство и Покрове и Спасение душ наших.

### **Тропарь, глас 2-й:**

**Апостоле** Христу Богу возлюбленне, / ускори избавити люди безответныя, / приемлет тя припадающа, / Иже падша на перси Приемый. / Егоже моли, Богослове, / и належащую мглу языков разгнати, / прося нам мира и велия милости.

### **Слава, и ныне, Богородичен, глас тойже:**

**Вся** паче смысла, / вся преславная Твоя, Богородице, таинства, / чистоте запечатанной и девству храниму, / Мати позналася еси Неложна, / Бога рождши Истиннаго, Того моли спастися душам нашим.

## НА УТРЕНИ

**На Бог Господь, тропарь святого дважды.**

**Слава, и ныне, Богородичен: Вся паче смысла:**

**По 1-м стихословии седален, глас 8.**

**Подобен: Премудрости:**

**Т**ы сын назвался еси / Божественного грома, / во еже оглушити ушеса злочестивых, / и трубы сладчае возгласив, о всеумдре, / в правая сердца, Слова воплощения: / и яко искренний друг на перси возлегл еси. / Отонудуже почерп разума явление, / всем проповедал еси Отцу Собезначальнаго, / Иоанне апостоле: / молися Христу Богу, / прегрешений оставление даровати / празднующым любовию святую память твою. [Дважды].

**Слава, и ныне, Богородичен:**

Премудрость и Слово / в Твоем чреве заченши неопально, / Мати Божия, міру родила еси мір содержащаго, / и в объятиих имела еси вся содержащаго, / пищедателя всех, и Творца твари. / Темже молю Тя Всесвятая Дево / и верою славлю Тя, избавитися мне прегрешений, / и в день суда, / егда предстати имам пред лицом Создателя моего, / Владычице Дево чистая, / Твою помощь тогда подаждь ми: / вся бо можеша, елика хоцеша, Всепетая.

**По 2-м стихословии седален, глас 8.**

**Подобен: Премудрости:**

**Г**лубину ловления оставив, / Креста тростию вся яве к вере уловил еси, / яко рыбы, языки: / ибо якоже тебе рече Христос, / показался еси ловец человеков, / к благочестию уловляя. / Темже насеял еси и слова разум во всем Патме, / и Ефес приобрел еси словесы твоими, / богослове апостоле: / моли Христа Бога, прегрешений оставление даровати, / празднующым любовию святую память твою. [Дважды].

**Слава, и ныне, Богородичен:**

**П**речистая Дево Мати Божия, / души моя страсти лютыя исцели, молюся: / и прощение даруй мне моих прегрешений, / яже безумне содеях: / душу и тело оскверних окаянный. / Увы мне, что сотворю в час оный, / внегда ангели душу мою разлучат от страстнаго моего телесе; / Тогда Помощница мне буди и Предстательница теплейшая: / Тя бо имам надежду раб Твой.

## По полиелеи седален, глас 8.

### Подобен: Премудрости:

Возлег на перси Иисусовы, / дерзновение получил еси, / яко ученик вопрошая: / кто есть предатель Твой, Господи; / И яко возлюблену зело сущу всехвальне, / хлебом сего яве тебе показа. / Темже яко таинник неизреченных быв, / Слова воплощения научаеши концы. / Богослове апостоле, / моли Христа Бога, согрешений оставление даровати, / празднующим любовию святую память твою. [Дважды].

### Слава, и ныне, Богородичен:

Небесную дверь и кивот, всесвятую гору, / светлый облак воспоим, неопалимую купину, / словесный рай, Евы воззвание, / вселенная вся великое сокровище, / яко спасение в Ней соделася миру, / и оставление древних согрешений. / Сего ради вопием Ей: / молися Сыну Твоему, / прегрешений оставление даровати, / благочестно поклоняющимся всесвятому Рождеству Твоему.

### Степенна, глас 4. Антифон 1-й, ихже стихи повторяюще поем:

От юности моя / мнози борют мя страсти, / но Сам мя заступи, / и спаси Спасе мой.

Ненавидящии Сиона, / посрамитесь от Господа, / яко трава бо огнем / будете изсохше.

**Слава:** / Святым Духом / всяка душа живится, / и чистотою возвышается, / светлеется Троическим Единством священнотайне.

**И ныне, тойже.**

### Прокимен, глас 4:

Во всю землю изыде вешание их, и в концы вселенная глаголы их.

**Стих:** Небеса поведают славу Божию:

Всякое дыхание:

### Евангелие Иоанна, зачало 67.

Во время оно: г҃ла сімѡнъ петръ іисъ: сімѡне іѡнннъ, любѡши ли мѧ пѧче сіхъ; **Г**лагола е҃мѡ: ѣй, г҃ди, ты вѣси, ѡакѡ люблю тѧ. **Г**҃ла е҃мѡ: паси ѡвцы моѧ. **Г**҃ла е҃мѡ пѧки вторѡе: сімѡне іѡнннъ, любѡши ли мѧ; **Г**лагола е҃мѡ: ѣй, г҃ди, ты вѣси, ѡакѡ люблю тѧ. **Г**҃ла е҃мѡ: паси ѡвцы моѧ. **Г**҃ла е҃мѡ третїе: сімѡне іѡнннъ, любѡши ли мѧ; ѡскорѡѣ (же) пѣтръ, ѡакѡ рече е҃мѡ третїе: любѡши ли мѧ; и глагола е҃мѡ: г҃ди, ты всѧ вѣси: ты вѣси, ѡакѡ люблю тѧ. **Г**҃ла е҃мѡ іисъ: паси ѡвцы моѧ: ѡмннъ, ѡмннъ г҃лю тебе: е҃гда быль еси юнъ, поѡсалса еси самъ и ходиль еси, ѡможе хотѣлъ еси: е҃гда же состарѣешиса, воздѣжеши рѣцѣ твои, и ѡнъ тѧ поѡшетъ и ведѣтъ, ѡможе не

хощеши. **С**іе же рече, назнаменѡ, коѡю смѣртїю прославитъ вѣа. **И** сїа рекъ, гла ѡмѡ:  
иди по мнѣ. **20** ѡвращьса же пѣтръ видѣ ѡучникѡ, ѡгоже люблѡше иисъ, вслѣдъ идѡща,  
иже и возлежѣ на вѣчери на пѣрси ѡгѡ и рече: гди, кто ѣсть предаѡ тѡ; Сего видѣвъ  
пѣтръ, глагола иисови: гди, сїе же что; **Г**ла ѡмѡ иисъ: аще хощѡ, да той превывѡетъ,  
дѡндеже прїидѡ, что къ тебѣ; ты по мнѣ гряди. **И**зыде же слѡво сѣ въ братїю, ѡкѡ  
ѡучникъ той не ѡумретъ. **И** не рече ѡмѡ иисъ, ѡкѡ не ѡумретъ, но: аще хощѡ томѡ  
превывѡти, дѡндеже прїидѡ, что къ тебѣ; **С**їе ѣсть ѡучникъ свидѣтельствѡи ѡ сїхъ,  
иже и написа сїа: и вѣмъ, ѡкѡ истинно ѣсть свидѣтельство ѡгѡ. **С**ѡтъ же и ина  
многа, ѡже сотвори иисъ, ѡже аще бы по ѡдиноѡ пиана вѡша, ни самоѡ мнѡ  
(всемѡ) мїрѡ вѡвѣстїти пишѡмыхъ книгъ. **А**минь.

### По 50-м псалме

**Слава:** / Молитвами апостола, / Милостиве, очисти / множества согрешений  
наших.

**И ныне:** / Молитвами Богородицы, / Милостиве, очисти / множества  
согрешений наших.

**Таже, глас 6:** Помилуй мя Боже / по велицей милости Твоей, / и по  
множеству щедрот Твоих / очисти беззаконие мое.

### Стихира, глас 2:

**Богослове девственнице, / учениче возлюбленне Спасов, / молитвами твоими  
нас спасай, / молимся, от всякаго вреда: / яко твое есмы стадо.**

### Канон Богородицы со ирмосом на 6, и апостола оба канона на 8.

#### Канон Богородицы, глас 2.

#### Песнь 1.

**Ирмос:** Во глубине постла иногда, / фараонитское всеоинство  
преоруженная сила, / воплощенное же Слово всезлбный грех потребило  
есть, / Препрославленный Господь, / славно бо прославися.

**Я**ко красную, яко предобрую, яко непорочную в женах, Бог Тя избрав, во  
утробу Твою вселися непорочную: Егоже моли Всенепорочная, порока грехов  
избавити вся поющыя Тя.

**Псаломски** Чистая, одесную якоже Царица, от Твоя утробы возсиявшаго  
Царя предстала еси: Егоже моли Всенепорочная, да деснаго предстателя покажет  
мя в день воздаяния, Богоневесто.

**Пресохшее** естество человеческое всякими безместии, рождающая Дождь Небесный, вся обновила еси: но молюся, и души моя бразду изсохшую покажи плодоносну, Богоневесто.

**У**мрившаяся садом разума, древом же жизни Чистая, к жизни вечной призвана быхом, от Тебе Богородице процветшим паче смысла, Христом Богом: Егоже со дерзновением моли, спаситися душам нашим.

**Канон Апостола, егоже краегранесие: Сына грома христокрасно пою.**

**Феофаново. Глас 2.**

**Песнь 1.**

**Ирмос:** Во глубине постла иногда, / фараонитское всевоинство преоруженная сила, / воплощенное же Слово всезлбный грех потребило есть, / Препрославленный Господь, / славно бо прославися.

**Ц**арство Небесное блаженно, еже проповедал еси восприим, и Слово собеседник быв Небесному, верующыя честному твоему проповеданию, и богословию, твоими молитвами сохрани.

**К**репок смысл являя, о всех небрегл еси сущих на земли, и уз естества: и Слово всеумудре, словесне же и умне сопребывая, от безсловесия безсловесно живущыя свободил еси.

**Н**ебесных разум приим богословеснейше, Бога Слова проповедал еси: в начале бе Слово и Слово бе к Своему Родителю, и Бог бе Слово, благовествуя научил еси.

**Богородичен:** Отроковиц божественных лик, божественнейше в женах Тя добрую воспевают, Богородице Владычице, добротами украшену Божества: добротворительное бо Слово паче слова родила еси.

**Другий канон апостола, егоже краегранесие: Моления божественному таиннику несущу.**

**Творение Иосифово. Глас 6.**

**Песнь 1.**

**Ирмос:** Яко по суху пешешествовав Израиль / по бездне стопами, / гонителя фараона / видя потопляема, / Богу / победную песнь / поим, вопияше.

**В**о глубины Духа мыслию озарився приник, и Рождество страшное нам ясно сказал еси, вопия богослове: в начале бе Слово Божие.

**П**риклоняеми множеством напастей, и страстей, и скорбей, и лютых находеньми, верую прибегаем к тебе Богослове, помощник буди рабом твоим.

**Д**уш наших страсти лютыя, яко врач изряден, уврачив мудре, вечнаго избави ны осуждения и огня, ходатайством твоим.

**Богородичен:** Бога зачешшая нас ради бывшего человека, Того умоли Чистая, в день суда нас ущедрити, многая согрешивших Ему.

**Катавасия:** Отверзу уста моя:

### **Песнь 3.**

**Ирмос:** Процвела есть пустыня яко крин Господи, / языческая неплодная церковь, / пришествием Твоим, / в нейже утвердися мое сердце.

Облечеса в мя человека, от чрева Твоего прошед Творец Всенепорочная, нетления одежду даруя, обнажшемуся многими безместии.

Пречестное родила еси Бога Слово Владычице, Егоже прилежно моли, ущедрити смиренную мою душу сладостей безчестии сетующую.

Язвы изцели души моя Пречистая, и смиренное сердце мое, огорченное ядом змеиным, действенною Твоею лечбою уврачуй.

Яко Мати имуще дерзновение Владычице, к Сыну Твоему, проси помощи озлобленным людям, беззаконных же низложи шатание.

### **Ин, ирмос тойже.**

**Ирмос:** Процвела есть пустыня яко крин Господи, / языческая неплодная церковь, / пришествием Твоим, / в нейже утвердися мое сердце.

Троицы явил еси богословным языком твоим, юже паче ума тайну, Иоанне богоблаженне: в Нейже утвердися мое сердце.

Язык твой бысть писменника трость Всесвятаго Духа, богописанно знаменующий честное твое и Божественное Евангелие.

Мудрости ты бездну почерпл еси всемудре, возлег богомудренным дерзновением на премудрости Источнице: и Сего богопроповедник был еси.

**Богородичен:** Едину девствующую и мать чтим, яко спасения ходатаицу бывшу нам Всенепорочная, и мир избавляющую молитвами Твоими.

### **Ин.**

**Ирмос:** Несть свят, якоже Ты / Господи Боже мой, / вознесый рог верных Твоих Блаже, / и утвердивый нас на камени / исповедания Твоего.

Умом светлым и чистым беседовал к Слову, богослове треблаженне, тайнонаучился еси от Него, сущым вышше слова яве, и всю тварь просветил еси.

Уз мя избави лютых греха треблаженне, любовию связуя мя Владыки и Бога: Егоже возлюбил еси тепле, и богослов Того нареклся еси.

Дался еси защитник нам, и ходатай, и избавитель, и ко Господу молебник, и чудес самоделатель, и источник исцелений Богослове. Темже тя почитаем.

**Богородичен:** Егда Слово, еже из Тебе воплотившееся неизреченно Богородице, на древо вознесся Креста, девственнику ученику, яко Деву Отроковицу, Тебе вручи.

### **Седален, глас 8.**

#### **Подобен: Премудрости:**

**Премудрости** на перси возлег, / и разуму сущих научився, / божественно възгремел еси: / в начале бе Слово, / добре написав первый Безначальное Рождество, / и проповедал еси всем Слова Воплощение. / Темже и языком яко мрежею уловив языки, / благодатию Духа изучаеши концы, / и просвещаеши чудесы, / богослове апостоле, / моли Христа Бога, грехов оставление даровати / празднующим любовию святую память твою. [Дважды]

#### **Слава, и ныне, Богородичен:**

**В** напасти многоплетенная впад, / от враг видимых и невидимых, / бурею одержимь безчисленных согрешений моих: / и яко к теплomu заступлению и покрову моему Чистая, / ко пристанищу притекаю Твояя благодати. / Темже Пречистая, из Тебе Воплощенному безсеменно, / молися прилежно о всех рабах Твоих, / непрестанно молящих Ти ся, Богородице Пречистая, / молящи Его присно, / согрешений оставление даровати / воспевающим достойно славу Твою.

### **Песнь 4.**

**Ирмос:** Пришел еси от Девы, / не ходатай, ни ангел, / но Сам Господи, воплощься, / и спасл еси всего мя человека. / Тем зову Ти: / слава силе Твоей Господи.

**Каплю** ми умиления одожди Владычице, отъемлющи весь сердца моего вар, и печаль мою, и пакостныя прилоги отгоняющи.

**Оружием** мя сладости уязвлена, и лежаща в ранах, Пречистая, не презри, но исцели копием и Кровию распеншегося Сына Твоего, и Бога нашего.

**Обогатившаяся** владычеством всякаго здания, люте мя обнищавша, благодати Божественныя удостой: яко да величаю Тя, яко благую мою Предстательницу, Всенепорочная.

**Возсия** из утробы Твоея, Отроковице неискусобрачная, Отчая Заря Христос, и просвети вселенную распинаемь, и демонскую тьму потреби.

#### **Ин, ирмос тойже.**

**Ирмос:** Пришел еси от Девы, / не ходатай, ни ангел, / но Сам Господи, воплощься, / и спасл еси всего мя человека. / Тем зову Ти: / слава силе Твоей Господи.

**Слово** тя богослова достойно показа. Того Божества тайнонаучив презряднейше, и еже по человеку строению научив неизреченному.

Ум божествен, и девственно тело стяжав, храм был еси, живой же и одушевленный славне, и жилище Всепетыя Троицы священнейшее.

Сыновством Пречистыя Девы почествовался еси девственниче блаженне, и брат показался еси избравшему тя, и ученика богослова совершившему.

**Богородичен:** Исцеляя Евы древнее преступление, в Тя Всенепорочную и Пречистую вселися Пребожественный, всего мя человека вообразити падша.

### **Ин.**

**Ирмос:** Христос моя сила, / Бог и Господь, / честная Церковь, / боголепно поет зывающи, / от смысла чиста, о Господе празднующи.

Каплями напоил еси слова славне, подсолнечную всю, мутныя нечестия воды изсушил еси благочестне: сего ради тя почитаем.

Крепостию опояши и державою, разслабленную всякими нанесеньми душу мою, всеумудре, от нечистых врагов, прибегающую в кров твой.

Храм быв Божественнаго Духа, в храме твоём Божественном верою присядящия, храмы покажи Божия богослове, ходатайством твоим.

**Богородичен:** Божественный храм Божий вопоим, Святую Деву яснее вси блажим, обожени бывше Ею, и от лютых избавляеми.

### **Песнь 5.**

**Ирмос:** Ходатай Богу и человеком был еси Христе Боже: / Тобою бо Владыко, к Светоначальнику Отцу Твоему, / от ночи неведения, / приведение имама.

Путь жизни рождающая, Пречистая, путевождствуй я ныне на путь правый, в безпутие и пропасть лютых падений безсловесно низриновеннаго.

Устранився без ума от разума Божия, блудно пожих в стране дальней страстей заблудив: но возврати Дево Чистая, спаси Твоими мя утешеньми.

Водами Твоими животочными напой раба Твоего, пламенем сожигаемого грехов, и палимаго прилоги демонскими, Дево Мати Пречистая.

Се во чреве Богородице Всепетая, Христа Бога паче слова имела еси, якоже Исаия провозгласи, и паче естества Сего Богородительнице родила еси.

### **Ин, ирмос тойже.**

**Ирмос:** Ходатай Богу и человеком был еси Христе Боже: / Тобою бо Владыко, к Светоначальнику Отцу Твоему, / от ночи неведения, / приведение имама.

Небесный ум богослове, явился еси благодатию, весь свет быв, еже к Началосвету приближением, и чистым твоим зрением, еже к Нему, обожаемь.

Умом чистым, и святыми устами богодохновенне, и пречистыми устами твоими Евангелие проповедал еси: и общее спасение всем верным предложил еси.

Со Христом живый от младенства, орган благодати от Него предложен был еси, богословии изъобучаемь, и Троицестей славе паче естества научаемь.

**Богородичен:** Глаголы Твоя поминающе, Тя ныне блажим: Тобою Всенепорочная блаженство неизреченное, и жизнь нестаряющуюся истинно прияхом.

**Ин.**

**Ирмос:** Божиим светом Твоим Блаже, / утреннюющих Ти души / любовью озри, молюся, / Тя ведети Слове Божий, / Истиннаго Бога, / от мрака греховнаго взывающа.

Яко утро просиял еси сущым на земли, Восток мысленный ясно проповедуя апостоле миру, во плоти пришедший, и многобожия тьму разоривший.

Богословии твоими священными всяку напоил еси душу, священнопроповедниче апостоле. Темже ти зову: изсохшее сердце мое грехми, все напои.

Уранихся стрелами вражиими, всего мя уздрави мудре, предстательством твоим, молюся: и на пути мя Божия управи, присно в беззаконних заблуждаема.

**Богородичен:** Егда предстала еси со возлюбленным учеником, у Креста Сына Твоего Всенепорочная, стенала еси плачущи, и дивилася еси Того, еже к человеком многому состраданию.

**Песнь 6.**

**Ирмос:** В бездне греховней валяся, / неизследную милосердия Твоего призываю бездну: / от тли Боже мя возведи.

Не яви мене демоном в радость на судущи будущем Владычице: но благосердно воззрвши на мя, Судию и Сына Твоего умоли.

Помыслы прогневах Тя Господи, и лукавыми и беззаконными моими деяньми: в молитву привожду Ти Матерь Твою, ущедрив спаси мя.

Осуждения избави мя Владычице, самоосужденна суща прегрешеньми, яко Судию рождшая, и Бога всяческих, Всепетая.

Иисуса Спаса моли, Егоже паче естества плотию родила еси, Дево Мати Пречистая, избавитися от бед рабом Твоим.

**Ин, ирмос тойже.**

**Ирмос:** В бездне греховней валяся, / неизследную милосердия Твоего призываю бездну: / от тли Боже мя возведи.

Иисус, Бог мой и Господь, твою чистоту приим, и всесовершенную святость, брата тя богослове прият.

Венчав свято житие твое, сице уповав, Мудрости возлегл еси на перси славне: и благодать оттуду извлекл еси.

Великая и Божественная сияния богословия твоего, всю просветиша славне вселенную, и светом Трислонечным озариша.

**Богородичен:** Небо прострый волею, небо земное иное распростре Тя Богомати Чистая, и из Тебе возсияв явися.

### **Ин.**

**Ирмос:** Житейское море / воздвигаемое зря / напастей бурею, / к тихому пристанищу Твоему притек воию Ти: / возведи от тли живот мой, / Многомилостиве.

**Бысть** яко трость скорописца, истинно богословныя язык твой, добропишущий разумение истинное, и закон зело новейший, на скрижалех богослове сердец наших.

**Увядивый** искоренно нечестия отрасли, яко возделатель всеизряднейший, в души же моей страх Божий насади славне, добродетелей благоплодие процветающее.

**Сына** Девы ты, из Тоя прошедый претявлено именован: с Неюже молися, положением всем сыном Божиим быти, всеприснопамятен, творящим благоугодная Ему.

**Богородичен:** **В** подобии плоти познася человеком Бог из Тебе Всенепорочная: Егоже моли всегда, плоти наша мудрования, Всечистая, умертвити пагубная.

### **Кондак, глас 2.**

**Величия** твоя девственниче, кто повесть; точиши бо чудеса, и изливаеши исцеления, и молишися о душах наших, яко богослов и друг Христов.

**Икос:** Высоты небесныя уведети, и моря глубины испытати дерзостно есть и непостижно: якоже бо звезды исчислити, и приморский песок невозможно отнюд, сие же ниже якоже Богослова рещи довольно, толицеми того венцы Христос, егоже возлюби, венча: Емуже и на перси возлег, и на тайне вечери с Ним яде, яко богослов и друг Христов.

### **Песнь 7.**

**Ирмос:** Богопротивное веление / беззаконнующаго мучителя, / высок пламень вознесло есть: / Христос же простре / благочестивым отроком росу духовную, / Сый благословен и препрославлен.

**Крепость** моя, и пение, и спасение, и твердое заступление, и стена непобедима сущи Владычице, борющыя мя демоны побори присно ищущыя умертвити мя.

**Бога** воплощши, девственными Твоими кровьюми обожила еси Дево, человечество. Темже молюся Тебе: страстьми оскверненнаго мя, и растленнаго вражиими коварствы, избави молитвами Твоими.

**П**ещь прообразоваше Рождество Твое Всенепорочная: отроки бо не опали, яко ниже ложесна Твоя Огнь нестерпимый. Темже молим Тя: избави рабы Твоя огня вечнаго.

**П**речистое зачатие, нетленное Рождество Ты едина показала еси, Дева пребывши: Бога бо зачала еси над всеми сушаго Чистая, человека бывша, верных на спасение и избавление.

### **Ин. Ирмос тойже.**

**Ирмос: Богопротивное веление / беззаконнующаго мучителя, / высок пламень вознесло есть: / Христос же простре / благочестивым отроком росу духовную, / Сый благословен и препрославлен.**

**Б**ожественным сияя светолитием, Духа Святаго ясно богословил еси, исходяща из Безначальнаго Отца, и почивающа в Сыне неотходно, яко Единосушна.

**В** тебе, блаженне, положи правды Солнце селение: небо приснодвижимо ты соделавый, и богословным твоим языком проповедуемый Христос, возлюбленне, препрославленный.

**Г**лагол твоих сила, Божественное вещание изыде, всеблаженне досточудне, и премірное твое Евангелие всю объяше землю, догматов величеством.

**Богородичен: Пречистое зачатие, нетленное Рождество Ты едина показала еси, Дева пребывши: Бога бо зачала еси над всеми сушаго Чистая, человека бывша, верных на спасение и избавление.**

### **Ин.**

**Ирмос: Росодательну убо пещь содела ангел / преподобным отроком, / халдеи же опаляющее веление / Божие мучителя увеща вопити: / благословен еси Боже отец наших.**

**Г**ром разшумевший во вся концы воспоем Богослова: имже всяк истинно слух огромен взятся от земли, и величается Христос всех творец.

**О**бзорно дому твоего благолепие всяку просвещает мысль: в немже всегда собирающесе, боголепне поем всяческих Творца, и благохвалим ты верно, суща предстателя нашего.

**Я**ко звезду ты светлосияющую веми, светоносными сиянии твоими просвещатися, учениче молимся Христов, избавляющихся от тьмы страстей и напастей всеразных, ходатайством твоим.

**Богородичен: Благословим Тя, Всенепорочная, Рождшую Благословеннаго Господа: благословеньми разоршаго Божескими проклятое естество человеческое, и обновившаго ны обветшавшыя тлею.**

## Песнь 8.

**Ирмос:** Пещь иногда огненная в Вавилоне / действия разделяше, / Божиим велением халдеи опаляющая, / верныя же орошающая, поющыя: / благословите вся дела Господня Господа.

Ревнуй добрым, злых удалившись, попечением божественных деяний, душе моя, молящуюся о тебе Богоматерь, и всех непостыдную имущи Предстательницу, яко милостиву и человеколюбиву.

Разрешила еси уз человечество древняго осуждения, Богородительнице. Темже молю Тя: разреши всяк союз злобный сердца моего, связавши мя Пречистая, Божественною любовью Зиждителя.

Славы Отчую Зарю рождши Богородице, безславием прегрешений сетующее сердце мое уясни: и славы присносущныя покажи мя причастника, яко да верою славлю Тя.

Явися нам из Тебе, Богородительнице, правды истинное Солнце, просвещая всяческая лучами Божества, воплощься Вышний, Егоже песнословим.

### Ин. Ирмос тойже.

**Ирмос:** Пещь иногда огненная в Вавилоне / действия разделяше, / Божиим велением халдеи опаляющая, / верныя же орошающая, поющыя: / благословите вся дела Господня Господа.

Якоже молния светлая проходящи, вселенней блаженне явился еси, чистоты светлостию, девства же блистанием, и благочестия догматы, мир просвещая, возлюбленне Христу Богу.

Тело и душу, и ум очистив, благовестил еси небесное Христово Евангелие: и ангелом единоклеточник на небесах быв зовещи ныне: благословите вся дела Господня Господа.

Столп светел, возложение же Божественно, небеснаго храма был еси, и престол чувства, и мудрости приятелище, богословия орган, поя: благословите вся дела Господня Господа.

**Богородичен:** Да клятву первую истребиши, и смертное осуждение древле праматере, из Девы Богоматере Слове Божий родился еси, всем даровав безсмертие негиблемо.

### Ин.

**Ирмос:** Из пламене преподобным росу источил еси, / и праведнаго жертву водою попалил еси: / вся бо твориши Христе, токмо еже хотети. / Тя превозносим во вся веки.

Риторствующим языком блаженне благообильствовал еси, и умершья злобою, вся живоуловил еси, священную твою приемшья проповедь: темже ты чувствуем, яко таинника неизреченных.

**Я**ко иный рай Божественный, дом твой показася, чудесы якоже цветы, всех души веселя апостоле, и страстей прогоняя зловоние.

**Бо**же, Боже мой, вонми ми, и избави мя от врагов, на кийждо день находящих мне, и смиренное сокрушающих сердце мое, имея молящагося Тебе божественного ученика Твоего.

**Богородичен:** Иисуса Спаса, Егоже воплотила еси от чистых кровей Твоих, Богорадованная, испроси ущедрити ны рабы Твоя, и от вечных муки изъяти.

### **Песнь 9.**

**Ирмос:** Безначальна Родителя Сын, Бог и Господь, / воплощься от Девы нам явися, / омраченная просветити, / собрати расточенная. / Тем Всепетую Богородицу величаем.

**В**кусив Адам от древа снеди неподобающия, смерть от древа горько обра: на древе пригвоздився Сын Твой, Пречистая, сладость безсмертия источи. Сего ради Тя почитаем.

**Ц**арица еси, Царя Христа и Господа паче слова рождши, Разорившаго адова царства: Егоже прилежно моли, Отроковице, вышняго царствия удостоити вся чествующыя Тя.

**У**благости, Владычице, смиренное сердце мое, озлобленное сладостными потопленьми, яко Благаго рождшая, и Благая сущи вся: и к покаянию мя благих дверей введи.

**М**ертв быв на Крест возносимь, сим уморивый змия. Темже зову Ти: умерщвленную душу мою лукавыми делы, помилуй Слове, и оживи молитвами Рождшия Тя.

### **Ин, ирмос тойже.**

**Ирмос:** Безначальна Родителя Сын, Бог и Господь, / воплощься от Девы нам явися, / омраченная просветити, / собрати расточенная. / Тем Всепетую Богородицу величаем.

**Н**ыне не в гаданиях, но лицом к лицу, сладости поток зрети удостоился еси, и реку мира, и Источник безсмертия: Имже ныне напаяемь наслаждаешься обожения.

**Н**аземное просил еси седалище прияти от Христа, но Он тебе перси Своя дарует: на няже возлег, богослове, твердым и пребывающим седением добрым обогатился еси, апостолов украшение.

**М**удрости погасил еси еллинския безбожное, в начале бе Слово, мудре провещав, и к Богу бе Слово, и истинно Бог бе Слово, Имже вся быша, видимая и невидимая.

**Богородичен:** Яко утро обрелася еси утреннее в нощи жития, девства зарями облистающи, Восток Солнца мысленнаго правды нам явльшая, Богомати Всечистая.

## **Ин.**

**Ирмос:** Бога человеком невозможно видети, / на Негоже не смеют чини ангельстии взирати: / Тобою же Всечистая, явися человеком / Слово воплощено. / Егоже величающе, / с небесными вои Тя ублажаем.

**Ч**асов и времен Господь Сый Избавитель, к в преполовлении дне на Кресте висяше, и тебе предаде, якоже девственнику блаженне, Приснодеву, славу неотъемлему дая, еже величати тя.

**С**ый с горними Божественными силами, и с ними Божественное восклицая песнопение, яже в дому твоём святом поющыя и песнословящыя Преплагаго, спасай ходатайствы твоими честными, Христов апостоле.

**В**ерою просящыя тя спасай ны от всякия беды, богослове блаженне, шествия наша яже ко Господу Духом направляя, и путевождствуя ны на путь мира заповедей Вседержителя.

**Богородичен:** Глас приносим Ти благодарствен Божии Матери светло, и возопием: радуйся, Престоле Божий превысочайший. Радуйся, Света Облаче. Радуйся Раю, Еюже райския сладости сподобихомся.

## **Светилен**

**Подобен:** Духом:

**Я**ко душею девственна ты, и телом блаженне Слово избра, богослове девственниче, и Того Божества чудна показа писца и слугу, иже и от земли преставился еси, не умер, но в Бозе жив, и безсмертен пребывая.

## **Слава:**

**Подобен:** Жены услышите:

**Г**ромов сын быв, человеком богословил еси, еже в начале бе Слово, апостоле Иоанне: возлегий бо на перси верно Владыки твоего, и оттуду почерп богословия струи, тварь напаяеши.

## **И ныне, Богородичен:**

**П**ри Кресте Сына Твоего и Бога, стоящи Всечистая со учеником девственником, се, глаголет, сын Твой, услыша Создавшаго: ученику же, се, глаголет, Мати твоя. С нимже Тя вси поем Богородительнице Дево.

**На хвалитех стихиры, на 4, глас 8.**

**Подобен:** О преславнаго чудесе:

**Б**лаженне Иоанне всеумудре, / обильною теплотою Христовы любве, / множае всех был еси учеников / любимь Всевидцу Слову, / и судящему правыми мерами всей вселенней, / чистоты и девства добротами озарився, / телом и помыслом, богоблаженне.

Девства процветение, / честных добродетелей приятное жилище, / мудрости орган, Духа храм, / светоносная уста благодати, / Церкви светлейшее око, / всечестнаго Иоанна песньми духовными / ныне восхвалим, / яко служителя Христова.

Богословия воды, / на перси возлег, / мудрости почерпл еси, / и мир напоил еси, Иоанне всеизящнейше, / Троицы ведением море изсушил еси безбожия, / столп быв и облак одушевлен, / наставляя ны к небесному наследию.

Евангелисте божественне, / благих источник, / царство недвижимое, жизнь вечную, / и радость неизглаголанную, / и зрения божественнаго наслаждение, / и богатодатно Христова дарования, / ум превосходяй, / и человеческий помысл, / сыне громов, благовествуяй миру уяснил еси.

### **Слава, глас 8. Самогласен:**

Благовестниче Иоанне, / равноангельне девственниче, / богослове, богонаученне, / православно миру пречистое ребро, / Кровь и воду источившее проповедал еси, / имже вечную жизнь / обретаем душам нашим.

### **И ныне, Богородичен.**

Владычице, приими молитвы раб Твоих:

**Славословие великое.**

**По трисвятом тропарь апостола.**

### **Тропарь, глас 2-й:**

Апостоле Христу Богу возлюбленне, / ускори избавити люди безответныя, / приемлет тя припадающа, / Иже падша на перси Приемый. / Егоже моли, Богослове, / и належащую мглу языков разгнати, / прося нам мира и велия милости.

### **Слава, и ныне, Богородичен, глас тойже:**

Вся паче смысла, / вся преславная Твоя, Богородице, таинства, / чистоте запечатанной и девству храниму, / Мати позналася еси Неложна, / Бога рождши Истиннаго, Того моли спастися душам нашим.

**Ектении, и отпуст.**

И поем стихиру самогласну святаго, юже хочет епископ. И исходит иерей с кадиллом, предъидущу ему светильнику, кадит на аналогии икону святаго апостола: И отдав кадило, стоит одесную страну аналогия. И приходит игумен ко аналогии, и творит два поклона, и целует икону святаго апостола. И по целовании един поклон, и возьмет струец на то устроенный, помазует себе от кандила святым елеем крестообразно на челе своем. И братия подобне целуют икону святаго. Игумен же помазует святым елеем иерея и прочию братию. По помазании же святаго елея, поем час 1-й. На 1-м часе тропарь и кондак апостола. И бывает конечный отпуст.

## На Литургии

### Блаженны от канона, песни 3-я и 6-я.

1. **Облечеся** в мя человека, от чрева Твоего прошед Творец Всенепорочная, нетления одежду даруя, обнажшемуся многими безместии.
2. **Пречестное** родила еси Бога Слово Владычице, Егоже прилежно моли, ущедрити смиренную мою душу сладостей безчестии сетующую.
3. **Язвы** изцели души моя Пречистая, и смиренное сердце мое, огорченное ядом змеиным, действенною Твоею лечбою уврачуй.
4. **Яко** Мати имуще дерзновение Владычице, к Сыну Твоему, проси помощи озлобленным людям, беззаконных же низложи шатание.
5. **Бысть** яко трость скорописца, истинно богословныя язык твой, добропишущий разумение истинное, и закон зело новейший, на скрижалех богослове сердец наших.
6. **Увядивый** искоренно нечестия отрасли, яко возделатель всеизряднейший, в души же моей страх Божий насади славне, добродетелей благоплодие процветающее.
7. **Сына** Девы ты, из Тоя прошедый претявлено именован: с Неюже молися, положением всем сыном Божиим быти, всеприснопамятне, творящим благоугодная Ему.
8. **В** подобии плоти познася человеком Бог из Тебе Всенепорочная: Егоже моли всегда, плоти наша мудрования, Всечистая, умертвити пагубная.

### Тропарь, глас 2-й:

Апостоле Христу Богу возлюбленне, / ускори избавити люди безответныя, / приемлет ты припадающа, / Иже падша на перси Приемый. / Егоже моли, Богослове, / и належащую мглу языков разгнати, / прося нам мира и велия милости.

### Кондак, глас 2.

Величия твоя девственнице, кто повесть; / точиши бо чудеса, / и изливаеши исцеления, / и молишися о душах наших, / яко богослов и друг Христов.

## Прокимен, глас 4:

**Прокимен:** Во всю землю изыде вещание их, - и в концы вселенных глаголы их.

**Стих:** Невеса повѣдаютъ слѣвѣ вѣію, твореніе же рѣкѣ егѡ возвѣщаетъ твѣрдъ.

Апостол, Соборнаго посланія Иоаннова, зачало 73, от полу.

[1 Ин. 4, 12 – 19.]

**Возлюбленнии:** Бѣга никтоже ни гдѣже видѣ. **Ѧ**ще дрѣгъ дрѣга любили, бѣгъ въ насъ превываетъ, и любви егѡ совершенна есть въ насъ. Ѡ семъ раздѣемъ, ѡкъ въ немъ превываемъ, и той въ насъ, ѡкъ ѡ дѣа своего дѣлъ есть намъ. **И** мы видѣхомъ и свидѣтельствемъ, ѡкъ оцъ посла сѣа спсителя мѣрѣ. **И**же аще исповѣсть, ѡкъ іисъ есть сѣ вѣіи, бѣгъ въ немъ превываетъ, и той въ вѣѣ. **И** мы познахомъ и вѣровахомъ любовь, ѡже имать бѣгъ къ намъ. **Бѣгъ** любви есть, и превывай въ любви въ вѣѣ превываетъ, и бѣгъ въ немъ превываетъ. Ѡ семъ совершается любви съ нами, да дерзновеніе имамы въ дѣнь сѣдній, занѣ, ѡкоже онь есть, и мы есмь въ мѣрѣ семъ. **Стрѣха** нѣсть въ любви, но совершенна любви вонъ изгонѣтъ стрѣхъ, ѡкъ стрѣхъ мѣкѣ имать: боѣса же не совершиса въ любви. **Мы** любили егѡ, ѡкъ той перѣвѣ возлюбилъ есть насъ.

**Аллилуиа. глас 1:** Исповѣдаютъ нѣса чдеса твоѣ, гдѣи, ѡбо истинѣ твоѡ въ цркви стѣхъ.

**Стих:** Бѣгъ прославляемъ въ совѣтѣ стѣхъ, велий и страшень есть надъ всѣми ѡкрѣстными егѡ.

**Евангелие Иоанна, зачало 61: [Ин. 19, 25 – 27.]**

**Стоѣхъ** же при крѣѣ іисовѣ мѣи егѡ и сестра мѣре егѡ маріа клеѡпова и маріа магдалиіна. **И**съ же видѣвъ мѣрь и ѡчѣкѣ стоѣца, егѡже люблѣше, гдѣ мѣри своей: жѣно, сѣ, сынъ твоѡ. **Потѡмъ** гдѣ ѡчѣкѣ: сѣ, мѣи твоѣ. **И** ѡ тогѡ часа поѣтъ ѡ ѡчѣкѣ во своѣ си.

**Причастен:** Во всю землю изыде вещание их, и в концы вселенных глаголы их.